

He Wai, He Oranga, Tiakina

Nā Frances Goulton


Whatukura

He Whakatau

Me mātua pānui kia mārama rawa koe i ngā whārangi 8–14 o tēnei pukapuka.

He whakarāpopoto

Pānuihia te whakarāpopoto ki te ākonga. He fīmatanga o ngā mea katoa. Kitea ana te tūhonotanga o Rangi ki tōna hoa, ki a Papa, i tana koha. Nā tēnei, he taonga tuku iho te wai ki ngā mea katoa. Ko koe te uri o Rangi rūua ko Papa, nō reira, ko koe te kaitiaki i te wai mō ake tonu atu.



He kupu whakataki

Kia kaha ki te whakamahi i ngā wheako, me ngā mōhio o ngā ākonga. Kia hāngai tonu te whakatenatena, ki te whakauru i ngā ākonga katoa. Me whakatitina rawa te pūkenga tiro whakamua. Matapakihia ngā kupu hou me mahi rawa te kupu taka me ngā whakaahua kei te uhi. Me whakamaumahara hoki te ākonga kia pātai ki a ia anō, i te wā e pānui ana ia mai i te fīmatanga ki te mutunga o te pānui.

Matapakihia te ahunga mai o te wai. Mā ngā ākonga e whakaputa ā rātou ake kōrero mō te fīmatanga o te wai. Me āta titiro ki te huringa o te wai me tō te tangata hononga ki taua huringa. Āta matapakihia te mahi a te tangata ki te whakararu i taua huringa me te whiu kua eke ki te whenua me te ao whānui. Me titiro ki te wāhanga e whakatūpato ana i te tangata ki te wai. Mā te ākonga e whakahoahoa tāna ake mahere mō te kāinga hei tiaki i te wai.

He Matapaki

Tirohia te pai o te pānui a te ākonga

I te wā o te matapaki me pānui te ākonga i te katoa, i tētahi wāhanga noa iho rānei o te pukapuka ki a koe. Kātahi ka:

- whakanui, āta tatari, whakahau tika;
- titiro mēnā e tika ana, e pai ana hoki (mā te tataui i ngā hē), te rere o te reo;
- titiro mēnā e mārama ana mā te whai i tētahi o ngā huarahi e whai ake nei;
 - te pātai i ngā whakapuaki māramatanga me ētahi e tika ana, ā, whakaritea kia kōrero anō te ākonga i tētahi wāhanga o te pakiwaitara ki āna kupu ake;
 - te pātai mō tētahi āhuetanga o te pakiwaitara, arā, te kaupapa, te ritenga, ngā ariā mātua, te raupapatanga, ngā kiripuaki;
 - te whakatenatena i te ākonga mō tana tiro ki mua i whakaputa ai ia i te wā o te whakataki.

Whakaarohia he aha atu hei mahi mā te ākonga

Me whakahau te ākonga:

- ki te whakamahi anō i te pukapuka i te taha o te mihini whitireo, i tōna kotahi rānei;
- ki te whakaoti i tētahi o ngā hei mahi e pā ana ki te pukapuka;
- ki te whakaharatau kia eke te ākonga ki tētahi atu taumata.

He whakapuaki māramatanga

1. He aha a Ranginui i tangi ai kātahi ka puta ko ngā waiora o te ao?
2. Ko wai ngā kaitiaki o tō tātou wai?
3. Whakamāramahia mai kia rua ngā huarahi kia mā tonu ai ngā wai?
4. Ki tō whakaaro he aha te tikanga o ngā kupu, “He wai, he oranga, tiakina”?
5. He aha i kī ai he taonga te wai?

Ngā whakautu ki ngā whakapuaki māramatanga

1. Nō tō rūua wehenga ka pakaru te aroha.
2. Ko tātou katoa.
3. Kohia ngā parapara. Whakawāteatia ngā huarahi wai.
4. He maha ngā whakautu rerekē.
5. He maha ngā whakautu rerekē.

He Mahere – Hei Tautoko i te Reo

E whai ake nei ētahi huarahi hei mahinga ngātahi mā ngā ākonga. Tirohia ngā whārangi kei te He Tirohanga Whānui mō ngā tino āhuetanga o te pukapuka nei.

Te pūtake

T He tuhi rerenga kōrero māmā mai i te pukapuka.

He whakatakinga ā-roro, he whakaharatau

I mua i te pānui me kōrero rawa ki te ākonga he aha te kōwae, me āta matapaki rawa e hia ngā kōwae. Kātahi ka tautuhi ai te kōrero matua kei tētahi o ngā kōwae. Kia mutu te matapaki tahi me te ākonga i te kōrero matua kei tētahi kōwae ka tipako ai he kōwae hei whakaharatau mā te ākonga.

Me āwhina rawa te ākonga ki te āta whakarārangi, ki te tuhi ki tōna reo ake. Mā te ākonga tonu e whakaaro pēnā ka whakanikoniko ia i tana tuinga mā te pikitia, mā te huahuetanga. Tērā ka tuku hei whakaaturanga ki te akomanga.